

豫章叢書

第三三冊

豫章叢書

第三十三冊

朝散集卷十四

宋 孔平仲 毅父 著

啟

與衡州交代王諤

叨膺宸檢獲領州符夫何私幸之多乃繼大賢之後
方時凝洹與俗阜安恭惟神明扶持福履蕃茂伏以
某官清規冠世雅望映朝藹然循良之稱簡在睿明
之聰想卽趨於召節豈復待於合符顧茲冥頑加以
疲暮小知受大未明宣化之方舊政告新庶免空官
之責更祈保衛少副瞻依

回衡州王守

比緣友契嘗寓音郵竊計賤誠已塵淨几方祈寒之
凝冽想冲履之靖康民載歌謠神增景福恭惟某官
自任甚重所居有間矧將覲於闕庭卽超居於台省
更祈保育前對寵休

回衡州樂倅

久服聲華未瞻顏色茲緣被命乃獲爲僚先辱緘滕
益欽謙厚恭惟某官清明自炤純粹無瑕暫資別駕
之功卽膺鋒車之召嚴冬布序坦履多休更冀保調
別承寵渥

上湖南監司

乃承宸命繆領州符夫何天幸之多獲託使封之末
熙春肇序刺部豐聞恭惟衛生有經擁福亡量伏以
某官清規冠世盛德儀朝簡在九重之知藹然八俊
之望持英蕩之節暫屈遠猷駕追鋒之車卽膺返召
更冀爲國自重副人所瞻

上長沙李帥

叨承宸命繆領州符夫何天幸之多獲託使封之末
熙春肇序菱舍多聞恭惟衛生有經擁福亡量伏以
某官清規映世盛德儀朝固結九重之知出當一面

之寄總軍民之政暫屈遠遊冠台閣之班卽膺迟召
更冀爲國自重副人所瞻

回趙憲

比緣便介賞貢柔緘未徹几格之間已蒙翰墨之賜
此蓋某官謙以牧已裕於接人略去威采之嚴仰認
眷與之厚卽當忝侍併叙腹心

又回衡守

比貢緘封想塵觀覽薦辱貽書之厚益知育德之謙
恭惟某官人材冠朝理狀名世介圭入覲已促行裝
細札成文卽膺褒詔眷序方半天倪愈和更冀保綏

前侯甄拔

又回衡倅

比貢

如前啟

恭惟某官人材冠朝理狀名世宣室方
思於賈誼海沂猶賴於王祥豈茲淹留卽有超拔方
熙春之布序想坦履之集休更冀保綏別承光寵

到任謝監司

竊以今之郡守古之諸侯付以千里之封疆叢然庶
事之根本惟良則治否則遂隳自顧愚蒙未始更練
尙賴光華之均被少容驚蹇之自強恭惟某官器業
邁倫問望高世不動聲色百姓晏暗有所施爲郡吏

仰法但稟行於命令當粗免於譴訶贈僚雖餘依歸
茲始

到任上執政

粗有民社蓋亦二千石之倫窮涉江湖其爲七百里
者伍婦乳野次舟毀石中驚魂莫招憂鬢都白以此
懲艾未塞愆尤自顧頑下之資素無當世之志沈迷
外補已度半生遲暮收還僅踰周歲以至江東京右
皆及終更督鑄按刑莫非待次旋濫居於省部卽仰
丐於州麾祇奉異恩復當煩使盜賊暴虐措置紕疎
宜其顯誅尙爾薄譴此蓋伏遇某官躬周召之懿佐

勛華之隆以仁存心以禮爲國鰥寡孤獨猶得其所
養蟲魚草木咸遂其爲生故茲冥頑未及竄戮某敢
不克己求復洗心自新庶幾力行可覆前過傳無求
備易不遐遺冀桑榆之可收終陶冶之大賜過此以
往未知所裁

到任回桂陽監司

比竊州符幸依隣庇方圖上計先辱貽書眷私之隆
感佩無斁陽和正盛吉履如何恭惟某官茂德有聞
敏政異等暫領于藩之寄卽承如綽之詞進陟顯榮
展盡底蘊更祈保育前對寵休

到任回隣郡

久別風儀闕修書問備員於此託庇有初特辱緘滕
良感德誼此蓋某官敦睦隣之道推念舊之懷未獲
晤言益深瞻企熙春方盛敏政多聞更冀保綏前承
光寵

回臨江馬守

久欽譽望每想標儀剖竹分符近聞拜命維桑展敬
尙阻趨風方畏暑之在辰計集清之多福恭惟某官
器爲國寶才實吏師千里承流未展鵬圖之遠十行
促召卽膺虎詔之榮更冀順序保綏副入願望

賀新漕胡師文

伏審光膺詔綽榮總漕台已練剛辰來臨刺部凡居
統按孰不欣榮恭惟某官學惟儒宗行實世表泰山
北斗悅服多士之心崐玉秋霜獨守古人之操西清
對召南郡試能果奉十行之褒移領一路之計恐未
暖席卽當賜環某朽薄常材衰遲末路幸依德庇尤
切懼悚

賀發運呂直父

竊審拜嘉十行總計八路練辰之吉視事有功恭惟
慶慰伏惟某官釣璜華胄應宿名卽先帝之所深知

屢將清詔今上之所親擢入踐都公固當進列從班
日親晬表蓋以東南貨財所聚國家強富之原遂輟
通才來持重柄號令風采已絕後而光前獻納論思
諒匪朝而伊夕炎蒸無幾澄按多餘更冀上爲廟朝
倍調寢餼

賀提舉董必

竊審光膺宸告榮抗使旂練時之嘉綜事云始恭惟
歡慶伏以某官高才端世盛德儀朝固結九重之知
出當一道之寄法倚寬厚民歸救寧某叨守左符獲
依卿蔭其爲欣抃實倍等夷

回監榷稅陳厚

伏承況書審已視事高才超越遠服屈蟠諒於轉漏
之間卽有賜環之命時寒方甚德履若何更冀保綏
前對光寵

回武岡陶達

竊高下風未見君子首蒙緘翰仰認謙冲方春序之
薄寒想德履之多福某官天資膚敏吏事精明家承
騷雅之餘邑有絃歌之裕卽聞顯擢別踐亨涂更冀
保綏前對光寵

賀曾孝序

竊審拜嘉十行持憲一道練時之吉視事有初恭惟
權慶伏以某官天資高明朝望烜赫奉欽哉之美意
握使者之重權先聲所馳眾望咸聳諒卽趨於召節
豈久駕於輶車某罪戾之餘依仰爲幸

賀柯漕移廣帥

竊審升華東觀移鎮南邦恭惟歡慶伏以某官氣粹
而清量和以廣卓爲使者之表蔚有君子之稱以易
說之深則文學可見其一二以郡規之盡則政事已
著於平生果登寶秘之除仍兼綬拊之任名實相副
中外皆歡某濫剖郡符久依德庇其爲欣抃尤倍等

夷

上范堯夫

比者台旆經從賓閣造請獲瞻溫粹道德之表仍接
豈弟忠信之談夫何晚生有此厚幸睽違未幾鄉仰
增深卑不敢以瀆尊故馳書之稽緩貴每先於下賤
忽賜教以丁寧奉受以還震悚無已某官居臯夔之
位存孔孟之心進退出處之方已全大節倚伏往來
之理何待鄙言天祐善人上欽良弼更祈調護益保
康寧引領門牆拳拳何已

賀黃漕

竊審光奉宸恩榮總邦計凡居封部同切欣愉恭惟
歡慶伏以某官才推吏師聲軼世表薦更中外之重
深結聖神之知揭節鄉邦移使荆楚先有至和之氣
蔚爲大有之年百城坐清諸事迎集諒不朝夕卽還
朝廷方秋暑之向隆計天倪之益粹更祈調護前席
寵光

賀何魁

此賀虹橋何昌言狀元啟

近觀春榜伏審爲天下第一諒深慶慰竊以朝廷恢
儒之百年主上右文之今日大設科舉以籠英髦家
自謂漢琬琰之珍人皆育楚煙霄之志而乃冠冕多

士鼓鐘鴻名苟非異能曷副殊選某官南金奇質天
驥逸才門承碧落之華世擅白楊之俊鏐光滅采誰
昔知之騰實飛聲崛然如此誠江國之盛事資鄉人
之美談某素聯姻家兼接里閭松茂柏悅良切歡心
墨妙筆精先承榮翰其爲感悚何以諭言

回柳州畢朝請

言念昔聯榜契今託隣光承折簡之見貽審視事之
伊始神明來相福履益蕃恭惟某官華國以文範民
惟信提封千里已聞孺袴之謠細札十行卽有絲綸
之召更祈保衛前對寵光